

305
21

鄉土志業編

張國淦著



一



始





林 卯
毅 卯

編 土
編 土

石 志
志 志

國立編譯館寄贈本



燕京大學圖書館
據館藏鈔本印行

鄉土志叢編例言

鄉土志爲研究地方自治必要之書遜清預備立憲敕各縣從速編纂而印成流布者不過百數十種其餘或僅謄真或爲稿底塵封於衙署檔度之間改革以來多所散佚本館廣事搜集得有數十種不敢自私自次第付梓公諸同好定名鄉土志叢編述例如左

一 本編依各志原稿付印凡分門別類及一切體例均仍其舊以規各縣當時之風尙

一 原稿中「國朝」「朝廷」「諭旨」「天恩」「賜」「敕」等字另行雙擡或單擡者本編僅爲空一格又地名或學校廟宇等原稿有另提一行者本編亦僅爲空一格以節省篇幅

一 原稿有前後體例參差者以前數葉之體例爲標準改歸一律

一 各志原稿本格式字蹟大小不一每葉行數每行字數亦多寡不同本編既

合爲一書每半葉十三行每行排四號字者均三十一字排五號字者均四十一字

一 原稿有雙行注文者本編改用五號字單行以期清朗

一 各志原稿多無目錄本編每種增訂分目每集另編總目以便檢閱

一 本編先出陝西十種其餘繼續出版不限種數

一 本編惟據原稿校對未暇參校他書倘有錯誤幸鑒正之

中華民國二十六年二月燕京大學圖書館

鄉土志叢編第一集目錄

陝西省

鄠縣鄉土志

上卷 本境 歷史 政績錄 兵事錄

中卷 書畫錄 孝友 義行 名宦祠

甘泉縣鄉土志

歷史 政績錄 兵事錄 書畫錄 人類 戶口 氏族 宗教 實業 地理 山水

道路 物產 商務

宜川鄉土志

星野 沿革 疆域 城池 山川 里甲 古蹟 勝景 風俗

岐山縣鄉土志

卷一 歷史 政績錄 兵事錄 卷二 書畫錄 卷三 人類 戶口

氏族 宗教 實業 地理 古蹟 祠廟 坊表 橋梁 市廛 學堂 山水 道路 物產 商務

城固縣鄉土志

歷史 建置沿革附表 政績錄 兵事錄 書畫錄 附名宦 鄉賢 忠義 節烈 人類 戶口

氏族 宗教 實業 地理 附古蹟 祠廟 坊表 橋梁 市廛 山水 道路 物產 商務

寧羌州鄉土志

歷史 建置沿革 政績錄 兵事錄 書畫錄 節烈 人類 戶口 氏族 宗教 實業

地理 境界 區劃 山脉 水誌 道路 物產 商務

神木鄉土志 卷一 天文 地理 山川 邊外屬地疆域 邊外屬地山川 營造 封爵 卷二

職官 貢賦 學校 祠祀 選舉 封廬 兵防 卷三 軍事 郵政 水利 鹽法 茶政 物產

卷四 風俗 祥異 名宦 人物 陵墓 古蹟 經籍 金石 藝文 拾遺 志異

朝邑縣鄉土志 沿革表 政績錄 兵事錄 香夢錄 人類 戶口 氏族 宗教 實業 地理 山水

道路 物產 商務

華州鄉土志 政績 兵事 香舊 人類 戶口 宗教 實業 地理 物產 商務

中部縣鄉土志 建置 歷史 政績錄 兵事 香舊 人類 戶口 氏族 宗教 實業 地理 寺觀

山水 道路 物產 商務

鄂縣鄉土志目錄

上卷

本境

歷史

政績錄

兵事錄

中卷

耆舊錄

孝友

義行

名宦祠

鄉賢祠

一一 一一 一〇 八 一 七 二 一 一



節烈祠	一二
人類	一三
戶口	一三
氏族	一三
宗教	一五
實業	一六
下卷	
地理	一
山	四
水	五
道路	五
物產	六
商務	七

鄂縣鄉土志上

本境

鄂縣 漢書戶扈鄂三字同昔少昊氏以鳥紀官有五雉九扈扈農正也古人食邑即以邑氏鄂之封其來遠矣

歷史

古崇國 連山易云緜封於崇緜禹父國語謂之崇伯與地志鄂縣古崇國今縣北有三過村乃大禹三過其門而不入遺趾

夏有扈國 尙書啟與有扈大戰於甘

商仍爲崇國 見通考蓋緜殛之後崇復爲扈商伐夏又以扈爲崇歟

周豐宮 豐即今之秦渡鎮在縣治東三十里史記崇侯虎譖西伯囚於羑里得放歸伐崇作豐詩曰既伐於崇作邑於豐朱傳崇國在鄂縣伐崇之後遷都於豐武王遷鎬豐宮不移每大事皆步至宗周書曰

王來至商至於豐是也

春秋時爲鄆國 左傳鄆文之昭也杜注在鄆縣東

戰國時亦稱有扈氏 吳子圖國篇云有扈氏君恃衆好勇以喪社稷

秦改扈爲鄆屬內史地 史記平王以岐豐之地賜秦襄公按岐即今岐山縣豐在今鄆縣秦一天

下內史兼治三輔

漢始置鄆縣屬右扶風 漢書地理志右扶風故秦內史高帝九年復罷爲內史武帝建元六年分

爲右內史太初元年更爲右扶風鄆縣屬焉

後漢屬司隸校尉部右扶風

魏置雍州三輔仍屬司隸部

晉鄆縣統於始平郡 泰始三年置

後魏分爲雍州屬京兆郡 太平真君七年置即今北三里鄆縣故城是

西魏屬雍州京兆尹

北周仍屬京兆尹

隋屬京兆郡 大業十年改今治

唐分天下爲十道鄆屬關內道京兆府京兆郡

宋屬永興軍路京兆府京兆郡

金改永興路爲京兆路鄆屬京兆路京兆府

元改京兆路爲安西路又改安西爲奉元路置陝西行中書省奉元路錄事司鄆

縣屬焉

明屬陝西布政司西安府

國朝因之

政績錄

官鄆者多矣而政績之可紀者則自漢始以前非無名宦也以無文獻之可徵也由漢以

迄於今上下三千年其可紀者僅有此數十人耳則其缺略亦多矣要之撫字心勞幹濟

才優婦孺頌其德口碑歌其功者必不至湮沒也官斯土者可以惕然省矣

漢

何武 字君公蜀郡郫縣人以射策爲郎遷郫令爲人仁厚好獎士類樂道人之善世以此多之所居無

赫赫名去後嘗見思官至京兆尹王莽欲篡漢陰誅不附己者武自殺人多冤之

唐

蘇珣 藍田人。中明經第。調鄆尉。鄆多訟者。日至。長史府珣決明辨。長史李義瑛異之。指廳事曰。此公座也。仕至戶部尚書。封河南郡公。致仕。卒。年八十一。諡曰文。

裴子餘 絳州稷山人。中明經補鄆尉。同舍李朝隱。程行謙。以文法稱。而子餘以儒顯。或問優劣於長史。陳崇業答曰。菊蘭異芬。胡有廢者。幼事繼母。以孝聞。諡曰孝子。餘居官清。家閑友愛。兄弟三人皆有志行。云。

盧奕 黃門監懷慎子。天寶初。令鄆所治。輒最積功。擢給事中。拜御史中丞。自懷慎。奕及奕三居其官。清節似之時。傳其美。後殉祿山之難。贈禮部尚書。諡曰貞烈。

李巽 字令叔。趙州贊皇人。舉拔萃。授鄆尉。天寶長於吏事。至治家。亦旬檢案牘簿書。如公府。吏有過。秋毫無縱。最工心計。為鹽鐵轉運使。一年較劉晏所入最多。之年。同明年過之。卒。贈尚書右僕射。

韋應物 京兆長安人。大歷十四年。為鄆令。性高潔。鮮食。寡欲。所居掃地焚香。治以清淨。為詩馳驟建安。後歷蘇州著詩十卷。

鄭羣 字宏之。滎陽人。以進士為鄆尉。拜監察御史。治官守身極謹。不掛於過去官。而人民思之。見韓昌黎。

文集

沈傳師 字子言。蘇州吳人。貞元末。舉進士。後登制科。為鄆尉。以廉靜聞。仕終吏部侍郎。

崔發 貝州武城人。敬宗時。為鄆令。開五坊人。毆百姓。命擒之。入曳於庭。詰之。乃中使也。上怒。收發繫臺獄。遇救釋。

宋

陳希亮 字公弼。其先京兆人。唐廣明中。遷眉州青神。之東山。幼孤。好學。中。天聖八年。進士。初為大理評事。後徙知鄆縣。老吏曹。膜侮法。以希亮年少。易之。希亮視事。首得其罪。膜叩頭出血。願自新。亮戒而捨之。卒。為善吏。有巫覡。斂財祭鬼。謂之春齋。否則有火。災民間。訛言有緋衣三老人。行火。希亮禁之。民不敢犯。火亦不行。毀淫祠。數百區。勸巫為農者七十餘家。及去官。父老。送之曰。公去我。緋衣老人復來矣。

程顥 河南人。學者稱明道先生。嘉祐間。舉進士。調主簿。令以其年少。易之。鄆民有借兄宅居者。得錢。兄之子訴曰。父所藏也。令以無證。難決。先生曰。此易辨也。問曰。爾父藏錢。何時曰。四十年。彼借何時曰。二十年。取錢視之。謂訴者曰。今官所鑄錢。五六年。即徧天下。此錢皆未藏。前數十年所鑄何也。其人不能答。遂服。令大奇之。有稅官以賄聞。怙力自謂能殺人。衆皆憚之。聞先生至。其人先為言曰。人謂某盜官錢。新

簿將發之某勢窮必殺人先生笑曰足下食君之祿詎肯盜錢萬一有之將自救不暇何能殺人其人默不敢言償所盜錢卒以善去南山僧舍有石佛歲傳其首放光遠近男女聚觀令不敢禁先生戒寺僧曰俟復見必先白吾職事不能往當取其首就觀之自是不復有光府境水害倉卒興役又盛暑疫行死者甚衆獨先生所部飲食茂舍無不安便人不勞而事集嘗謂人曰吾之董役乃治軍法也當路者欲薦之多問所欲先生曰薦士當以才之所堪不當問所欲後哲宗召爲宗正丞未行卒諡曰純公從祀孔子廟庭

張儼 宣和元年來知鄆管勾勸農公事兼兵馬監押作空翠堂自爲記

李宗 大梁人舉進士爲鄆簿有政聲後知慶陽

金

楊達夫 字晉卿三原進士主鄆縣簿事一從簡吏民樂之

劉君 失其名彭城人大定二十二年以壽州酒使來知鄆多善政見修城記

元

察的兒 爲鄆達魯花赤蒞政十二年政平訟理境產嘉禾瑞麥縣刻石爲圖

寇靖 字伯衡由進士爲鄆令興學勸農懇懇教化不尙威刑與平路當衝要整屋協濟不足欲引鄆分代之君乃詣府爭之曰鄆地狹民寡已割四鄉之一畀整屋矣今又嫁重負於鄆民將不堪命遂得仍舊還水歲潰堤壞民田府徵役千人蓋捷稱是吏緣爲奸君程其工止發三百人器用半之事治而民不擾時諸官府田租石當楮縑五十實贏市值什四五公言國家立法之意謂地遠艱輸者折色寬民力也今執是例取之豈爲民父母之道哉終其任取租不計縑既去民思之爲勒碑頌德焉

明

許訴 開封舉人洪武中知鄆縣蒞政以勤撫民以惠興學校修廟宇措置均宜民到于今稱之

徐純 字德善澧州人正統中知鄆縣刑清訟簡興學愛民諸官署並城隍廟皆其責理

張億 知鄆縣嘗夜出微行民間婦姑紡績姑遺婦視所釀酒婦視之對曰有如張縣君澈底清矣億聞之喜翼日以木棉勞之

周儀 孝義舉人爲鄆教諭與諸生約雞鳴從事乃先起衣冠而俟比諸生背誦書史畢甫寅卯耳由是諸生多淵博邑民有事於城隍廟聲伎繁艷觀者塞途諸生無一敢延頸者則其教可知矣

程鵬 解州進士正德中知鄆縣和厚坦易居常無怒亦未嘗過用刑威人以此德之方聽訟頃有欲平者

聽之累遷刑部郎中

王文秀 閩中人樸茂質實遇事勤懇若理家然

康天爵 字汝修以進士知鄆縣治以安養百姓爲主不窮治詞訟隸不敢下鄉凡修建木物取諸佛老之宮用力役亦少素有廉慎之節人或以爲過激然實非他人所能也故至今有去後之思焉

楊祐 內江進士以郎中誦知鄆縣學識深純氣質端粹凡事精練後至少卿

宋廷琦 城武舉人有清操惠政民受其福學亦蘊藉淵深尤精詞翰士民爲之建祠

賈希周 彰德舉人剖決如流民接於目輒識姓名不忘人敬而畏之

陳邦瑞 孟津舉人剛明果斷百姓帖服不敢輕犯法焉

王瑋 永甯舉人愛養百姓丕振儒風

李守經 濮州舉人法嚴令行治小人尤嚴

馬呈圖 字道甫蜀內江舉人隆慶中令鄆性剛果諳於治體動中機宜申免濬河役夫節省里中冗費吏畏民懷政聲藉甚考最將以科道用適平涼鎮原通負民梗難治加平涼府同知銜管理縣事鄆民間之聚衆數百訴於當道當道以事難違挽竟遷去去鄆三載民思其德欲建生祠請於當道當道以其得

民許之咸甯王太宰用賓爲之記時萬曆七年己卯三月也

馬廷驊 孝義舉人悃惓無華平易近人民方賴其休養尋以疾卒

李本盛 解州舉人剖斷無難節省有法民受和平之福

賈待價 商邱舉人精敏老練遇事敢爲至條鞭法尤力主其事

延論 平定州進士歲旱請減所贖賑貸饑民全活甚衆

王九皋 濮州舉人萬曆丙申洩任繼王太史修志而太史原板至此失傳矣惜哉

呂仲信 唐縣舉人引檀谷阜谷及阿福泉諸水逕縣東關北折而西入於澗人謂之呂公河

王宣 字君召河南武陟舉人萬曆辛丑蒞任爲人沉靜丰姿屹然人不可干以私邑中諸廢墜舉修之若家督之于家焉條鞭法行前令互有紕繆公請比廩爲折色夏秋二稅驛站均徭一切通融派徵議上監司成報可因著爲則焉邑有李某家温厚爲倫之長前後發贖以千數計然輒發輒已及發在公公薄下數杖意若不省乃布方略游卒出諸倫皆緣手獲而李亦前諸倫死盜風爲之一息甲辰歲饑會城圯請以工代賑由是邑有百雉之雄民無轉死之苦織局之設諸邑歲有額辦公按諸里常平倉頗有餘儲則爲闕白以其餘充賦鄆傍南山薪炭灰木及他物公府歲下鄆取辦民受其惠因善爲調停無苟阿承民

承民得弛其負擔先時獄囚或不時省決致有冤濫公俱諫決不待時所決無恨其催科勾攝一切濫票俱不得行士民深感其德爲立生祠後陞冀州知州邑人韓進士期維爲撰德政碑

呂大章 安邑選貢時盜屢與鄆爭澇利相訟於當道大章據理力請澇遂得永爲鄆利至今士民頌之

白應輝 江津舉人蒞任不以家屬從越四載囊橐蕭然計擒回賊沙倉等十一名有奇功士民爲之建祠有德政碑河臺碑又有鳴琴異績卷俘盜圖紀循良政績冊及平獄謠騷蝗頌遷雲南蒙化府同知

劉璞 字柘山莒州舉人萬曆乙巳知鄆縣是歲鄆自四月至七月不雨璞至承施粥之檄即捐粟五百石爲倡於是王輔世等輸粟一千五百有奇民得全活先是回賊倡亂整屋白龍溝鄆之龐家村聲勢相應前令捕沙倉等真於法而探囊穿窬之輩尙多璞爲連環保甲法每保壯丁二十人教師一人每月三日教習餘日歸農復舉社學教民間子弟又以社倉原額五千六百有奇穀麥兼備貯穀猶易貯麥爲難循行區畫刊爲條例犁然修舉著鄆志兼四事約班

張宗孟 字泗源山西定襄進士授鄆令以乙亥二月蒞任未蒞任時賊薄城下宗孟聞警兼程而進至則四門皆土塞遂野服從間道登陴鼓舞守者賊宵遁乃治鄆城四隅建敵樓重葺四門泚懸樓二十四座建堡六十六處設火具賊過城下輒相戒毋犯又建市心樓重修大成殿移泮池欄星門外居恒與人

語煦煦可親而階庭肅穆吏胥奔走無錯趾諸臺橫有徵調即拒不應左帥兵過處俱入城宗孟之一切

供億置城外局其門因誣譖於督院上其事奉旨勘問士民保留乃以降級攝令事後官至按察司僉事

國朝

魏似韓 字雲卿山東萊蕪進士廉潔精勤愛民如子課士如師重修明倫堂凡事持大體有古循吏風

尋陞工部屯田司主事

趙之璧 浙江慈谿舉人秉性和平遇事裁決如流尤長於詩文所著有偶存集風流蘊藉仙吏才也以不善事當道去士民惜之

馬光遠 山東大嵩衛進士精明剛斷人不敢干以邪私有巨奸數人立斃杖下法紀肅然甫數月緣前任事去惜哉

劉文燦 遼東開元舉人精敏明決捐俸修太史橋民不病涉丁外艱去

曹爾弼 山西陵川廩生老成練達善於因事就功時軍需旁午飲酒賦詩裕如也捐俸百金重修大成殿陞內閣中書舍人

康如璉 山西安邑進士蒞任澁澗用兵供應如雲事皆辦治而人不擾以其暇重續邑志科目中優吏

才者以丁內艱去

金廷襄 字應枚廣甯貢士蒞任年甚少精敏爽直姦宄望而畏之豪強亦因之斂跡其時甫經大荒捐囊辦治牛種爲百姓開墾荒田酌劑徵收嚴禁妄訴及戲樂賭博以與民休息丁父艱去至今邑人思之
朱文卿 字亞翁直隸懷來進士忠厚慈祥非法不爲歷七年從無不信之言漢史所謂安靜之吏惻惻無華日計不足月計有餘者其禁絕孤魂淫祀尤爲特著丰采云

張世勳 江南蕪湖例貢凡事因俗而治吏民安之性喜文史善行書楷法令中爲崇尚風雅者捐俸重修澇水石橋尤爲遺惠云

吳廷芝 字卉長福建永定舉人學問淹博善書法接紳士有禮臨民以寬刑建魁星樓於城東南隅重修樞星門以石易木最留心於邑之文風者

靳樹榛 鑲黃旗漢軍由例監効力康熙六十年蒞任敦重寡言精於吏治而引盜禁賭執法尤嚴竊賊皆指鄉相戒曰靳家庄勿輕犯也遂望風遠遁民賴以安幾於夜不閉戶

趙爾楷 直隸西甯進士廉明剛直不諛上不徇情折獄如神健訟及豪惡望而斂跡胥吏無一敢滋弊者征科寬而百姓爭輸辦軍需未嘗以絲毫累民有守有爲無愧循良六年以丁憂歸

王樓堂 字植三河南柘城附生以保舉孝廉蒞任下車之始即革去積年縣役大累歲抄預放倉糧接濟貧民甘受參罰秋大旱躬騰深山甘霖沛應素以愛民爲心故多善政

李文漢 字上昭江西金谿人內閣供事以軍功保舉除知鄆縣吏治精敏勤於修理如文廟大成殿崇聖祠名宦鄉賢二祠大觀樓雲路坊北城樓西河亭澇河兩堤諸興作皆是又於市集革前小斗陰弊仍用大斗窮民便之

舒其紳 字佩斯直隸任邱增生廉明慈惠才學兼優翔明道書院自爲記慨然有培士風深意邑中數失火剏修火神廟引災調署興安州再調成陽士民以未得久沾其澤攀轅難留立去思碑至今過碑者多下拜

宋澤 字潤生山西寧鄉進士清廉慈惠御衆以寬尤留心學校每於書院課士文必批評盡致卒於任不能歸葬士民饋資送之至今猶有宋青天之稱云

陳文勳 字勉亭湖南人以留場同知調署鄆令爲人忠厚好獎士類添建書院齋房十餘所方之古來循良庶幾無愧焉後卒於留場本任留場士民稟請 上憲奏入國史循吏傳

胡海章 字禹門四川成都舉人光緒庚辰署鄆廉靜慈祥決獄如神吏畏其威畏其惠鄉里之叟訟

者頓息署任一載善政舉一時有胡青天之稱邑人頌其德政曰弊絕風清至今咸有去後之思焉

劉聲琦 字少芸四川中江縣人光緒己卯舉人庚寅令鄂清濶自操於凡興利除弊之事無不躬親相

度值太史橋傾圮釀資重修事竣而民不擾發奸摘伏民無冤枉尤加惠士林捐廉數百金置經史諸子

之書且為增膏火之額寒峻於今食德云

劉璋毓 字琨秀湖南人光緒戊戌署鄂視民如子見不仁者搏擊之如鷹鷂之逐鳥雀也一時惡少相

戒不敢犯法焉值秋淫雨為災太平河水溢傷民房屋禾稼甚多公躬親查災捐廉賑卹減僕從罷徭役

以蘇民困書院學租日久迷失躬親查究一無遺漏捐百餘金以益學堂膏火邑人士歌功頌德未艾也

兵事錄 天地之道治極則生亂亂極則思治一治一亂皆兵之由是以先王耀德不觀兵亦未嘗

諱言兵也鄂邑自教匪倡亂以後回匪髮捻相繼蹂躪生民塗炭極矣痛定思痛尙其為

未雨之綢繆乎

有扈氏威侮五行怠棄三正啓伐之大戰於甘 孔傳甘有扈南郊蔡傳甘在今扶風鄂縣

文王伐崇作邑於豐 鄂古崇伯國商時崇侯虎譜西北於紂囚之美里後得釋三年伐崇作邑於豐

即今縣東三十里秦渡鎮

春秋僖公十有五年冬十月晉侯及秦伯戰於韓獲晉侯左傳秦獲晉侯以歸乃

舍靈臺 杜注靈臺在京兆鄂縣所以格絕令不得通內外

光武建始二年赤眉引兵而西最為猛厲衆號百萬自終南山轉掠城邑 見劉盆子

傳

魏志建安二十二年以淵行護軍將軍督朱靈路招等擊破終南山賊劉雄降其

眾 見夏侯淵傳

晉懷帝永嘉元年劉曜既據長安與賈疇允諸軍戰曜衆大敗退保甘渠 即甘

水雍大記甘水出鄂縣南甘谷按甘谷舊為鄂地今已割入整屋故後山水不載

魏書陸真傳高宗和平中咸陽民趙受昌劉或自署龍驤將軍煽動鄂整屋二縣

聚衆數百人擾赤谷以叛真與雍州刺史劉邈討平之

通鑑綱目柴紹將赴太原謂其妻李氏曰尊公舉兵欲偕行則不可留此則及禍

奈何李氏曰君第速行我一婦人易以潛匿當自為計紹遂行李氏歸鄂縣別墅

散家貲聚徒衆淵從弟神通亦在長安亡入鄂縣山中與長安大俠史萬寶等起

兵以應淵西域商何潘仁入司竹園爲盜有衆數萬劫李綱爲長史李氏使其奴馬三寶說潘仁與之就神通合勢攻鄂縣下之神通衆逾一萬以令狐德棻爲記室李氏又使馬三寶說羣盜皆師衆從之徇整屋武功始平皆下之衆至七萬右親衛段綸娶淵女亦聚衆於藍田將萬餘人各遣使迎淵淵使柴紹將數百騎迎李氏關中羣盜皆請降淵以書慰勞使受世民節制營中號李氏軍曰娘子軍今鄂有陳兵坊村相傳爲李氏散家聚徒衆處

通鑑唐代宗廣德元年冬十二月築城於鄂縣及中渭橋屯兵以備吐蕃以維奉先爲鄂縣築城使遂將其兵

宦者傅帝與元載計除魚朝恩乃使李抱玉節度山南西道又析鄂整屋等縣以與抱玉朝恩不知爲虞

宋朝奉郎通叛軍府事唐邁捕盜圭峯山內題逍遙棲禪寺詩有捲旆搜山憶盜賊之句

明嘉靖中乾州人樊伸作亂竄入終南山尋討平之

萬歷甲辰回賊倡亂整屋之白龍溝鄂縣之龐家村聲勢相應窟穴其中鄂令白應輝計擒沙倉等十一人置於法而探囊穿窬之盜尙多鄂令劉璞爲連環保甲法每保壯丁二十人教士一人每月三日教習餘日歸農回亂遂息見資政錄
麓樵紀聞叛兵楊國棟擁二千騎披雙鎧直抵西安乞撫巡撫練國事在鄂縣聞之馳還知賊不受撫必西走整屋密檄沿途設伏時禾茂泥淖騎不任馳伏發殲其半賊斬國棟以獻餘逃入終南山

崇正甲戌六月賊混世王八太王隨山虎等自鄭安出從鄂縣至整屋馬召村村民以鄉勇拒之殺掠甚慘

麓樵紀聞朝命豫楚晉蜀兵四道入陝高迎祥李自成竄入終南山十一月賊自郿整至臨城於南宅堡城門發三矢而去當是時賊亂關中有名字者以十數高迎祥李自成羅汝才黨羽最衆孫傳庭設方略親擊迎祥於黑水峪擒之李自成襲爲闖王常出沒於終南山中鄂當其衝受害甚慘一時士夫婦女殉難者甚衆國朝順治二年賀負自興安突至人不知防城遂陷遭其害者甚衆七年至十七

年賊首王才周禹劉四王友權必強王根害祁克贊楊剛白守愛李沙鶴李廣等先後盤踞南山一帶劫掠村堡焚燒廬舍防將張世美陳福亮勦撫並施根株俱盡民始獲安

康熙十三年遊擊程福亮聞蜀變自西鄉退兵三河口整鄂兩縣運糧給之明年八月漢中失守福亮遂退駐黑水谷鄂民猶運糧以給

十六年六月僞總兵王進孝僞副將李成棟等出黑谷屯仙遊寺大掠整鄂一帶八月總兵王好文至整屋撫賊賊亦以糧盡遁去

嘉慶三年白蓮教匪林齊與其妻王氏作亂自川楚擾至興安漢中一帶又出子午谷竄至縣境爾時承平日久民不知兵一時受害最慘四鄉劫掠幾空七月初六日夜賊撲攻縣城有擄至賊中者見城上有騎驛巡閱指揮拒守者賊計不得施遂去後見中樓上所祀文昌像即指揮拒守之人也遂稟邑令請於七月初七日設祭酬報至今猶祀之無輟

八年甯陝兵變賊分黨出子午谷攻鄂縣時總兵楊芳赴固原聞變卽帥固原兵

二百人馳救鏖戰終夜身受數創黎明賊知爲芳遂引去以楊芳素得士心也後單騎入營降賊魁蒲大方鄉人比之爲郭汾陽單騎見回紇云

同治元年緒賊洪秀全餘黨郭擺擺由湖北竄至興安一帶出大逆峪至尹家衛由禹王廟入鄂西至丈八寺住紮隨經旗員帶兵逐入甘肅階州文縣等處漢中鎮軍川軍甘軍會勦滅之

二年陝回內訌西鳳同乾同時起事有賊孫思萬者號孫元帥盤踞牛東村一帶逢人卽殺見屋卽燒橫暴幾無人理東漢赤眉屠長安之慘尙不至是十室九空事平村堡幾虛無人焉先是回漢相爭不過如漳泉大姓之械鬪未必叛也西鄉灰渠頭回民村也南四操糾合縣之四鄉村民直搗灰渠頭俗謂創窠子然烏合之衆人心散渙回自村中出衆爲之辟易賊知鄉民無能執刀亂戮爭相逃走死者甚衆自此鄉民膽怯見賊如羊之遇狼只有受死而已噫慘矣

三年五月初八日髮賊藍二順由湖入陝出子午谷至秦渡鎮假冒官兵入市搶物人始知爲賊時屆農忙驟不及避被害尤甚又有賊藍大順陷整屋縣盤踞城

內將軍多隆阿馳軍圍之賊善守半年不下鄂運軍火絡繹不絕鄉民苦之將軍親上礮臺督攻中賊礮子傷目卒於軍諸將見主帥死攻益力賊由西城遁大兵追及藍逆中數鎗遂成擒餘黨悉滅

五年十二月二十日西撫張總愚號小燕王在灞橋敗蕭軍門之兵竄至鄂境南至南山北至渭河號四十萬衆盤据鄂境過年時來撲城晝夜戒嚴至二月初二日始往西竄四月又由渭北竄入鄂境經郭寶昌軍追逐出境

元年至六年回匪髮逆往來蹂躪不絕髮則有曹丕時謝大脚等股回則有馬二元馬化龍等股倏忽剽掠人不及避又有兩次叛軍駐紮西坡經彭中軍提道劉中丞蓉勦撫平之村舍寺廟焚燬一空至今幾四十年蕭條猶昔元氣未復哀哉

鄂縣鄉土志中

耆舊錄

昔孟子以友天下之善士爲未足論世知人是爲尙友今居一邑而邑之前賢漠然無聞烏在其能尙友乎表前修而風後進則耆舊之錄所最亟也是編始於北魏而北魏以前則缺焉亦猶錄政績始自漢之意云爾

列傳北魏

周澹爲人多方術尤善醫藥爲太醫令太宗嘗苦風眩澹治得愈賜爵成德侯神瑞二年京師饑朝議將遷於鄴周澹與博士祭酒崔浩進計論其不可之意太宗大然之曰惟此二人與朕同意也泰常四年卒諡曰恭見魏書

唐

殷開山名暹以字行世居江南祖不害仕陳陳亡徙京兆遂爲鄠人開山涉獵書史工尺牘爲隋大谷長高祖兵起從攻西河破術文昇之兵從秦王討薛舉平仁果討王世充征劉黑闥卒贈陝東道大行臺右僕射諡曰節配饗高祖廟廷見唐書列傳今滂峪口內教場相傳爲殷開山操練之處

宋

楊礪字汝礪建隆中舉進士甲科父喪絕水漿數日服除養母閒居無仕進意鄉舊移書敦勸礪乃赴官歲餘又以母疾棄官後召授隴州防禦推官遷光祿寺丞丁內艱起就職後由員外郎知鄂州以善政聞後累官至樞密副使卒真宗軫悼謂宰相曰礪介直清苦方當任用遽此淪謝即冒雨臨其喪礪就舍委巷中乘輿不能進步至其第嗟嘆久之

元

賀賁其先河東隰州人父種德徙關中遂爲鄆人有材略善攻戰數從軍有功關中兵後積屍滿野賁買地金天門外爲大塚收瘞之遠近聞者爭輸屍來葬復以私錢勞之嘗治室於毀垣中得白金七千五百兩謂其妻鄭氏曰語云無故獲千金必有非常之禍時世祖以皇太子受詔征雲南乃持五千兩往獻之世祖即位賜金符總京兆諸軍卒贈雍國公諡貞獻

仁傑字寬甫賀賁之子從世祖南征雲南北征乃顏皆著勞績後與董文忠居中事上同志協力知無不言言無不聽多所裨益而言不外泄帝深愛重之一日召仁傑至榻前出白金謂之曰此汝父六盤山所獻者聞汝母來可持以歸養辭不許乃歸白母盡散之宗族帝選民童女充後宮及有司買物多非其土

產山後鹽禁久爲民害皆奏罷之民爲之立祠其妻劉氏沒帝欲爲娶貴族固辭乃娶民間女後喪明夫婦相愛如初未嘗直腰大德九年年七十二請老拜光祿大夫卒封雍國公諡忠貞延祐六年追封奉元王詳見元史列傳

勝字貞卿一字舉安小字伯顏以小字行仁傑之子嘗從許衡學通經傳大義年十六入宿衛凝重寡言世祖甚器重之大臣有密奏輒屏左右獨留勝許聽出則參乘輿入則侍帷幄非休沐不得至家至元二十四年乃顏叛帝親征勝直武帳中詰旦合戰還侍帝側矢交帳前勝立侍不動一日獵還勝參乘伶人蒙采葷作獅子舞以迎駕象驚奔逸不可制勝投當象前後至者斷鞞縱象乘輿乃安勝退創甚帝親撫之遣尙醫尙食視護拜集賢學士領太史院後屢遷爲大都護及開府儀同三司上柱國及英宗即位鐵木迭兒誣殺之泰定初詔雪其冤追封秦國公諡惠愍至正三年追封涇陽王改諡忠宣子惟一子允中賜蒙古氏名太平官至丞相孫均字公乘後改名也先忽都官至宣政院使俱爲賢相名臣而死于讒譖人皆哀之其事詳具於元史列傳茲不備載

明

崔敬以進士授太康知縣有遺愛民皆稱之

張賢 字思齊永樂中以舉人授吏部司務遷驗封郎中剛廉自持超拜山西右布政使威惠並流遠近悅服尋乞歸敝廬數椽謹庇風雨一統志稱其廉幹老成

王瑛 字廷玉性剛直材貌端凝由貢士爲大甯令大甯民散處山中多黷而負固急則益避匿死弗肯出瑛與約令自至爲平其獄訟賦役俾各得所民歡然從之再補長清令吏舞文爲百姓患瑛黜老吏三四入其患頓除諸生有段善者家貧無室聘富民女妻之薛文清公行部至其邑品其治行爲山東第一薦爲濟南知府奏未下而卒

馮俊 字子英鄉舉時甫十有八歲既遊太學會興師乃上書自言能製呂公戰車中貴人召而問焉言頗不遜中貴人怒指爲誑慢落籍爲民既歸於所居漢水上藝樹竹木花卉相錯如繡因名其地爲錦繡溝既老猶曰我將才也惜乎世無知之者

王鉉 字大器瑛長子少涉經史不與物較閱巷亡賴者醜酒狂罵輒走避以爲常未嘗言人長短鄰子夜入盜麥家人捕之欲送之官鉉訶止之曰不足胡不來告仍以所盜與之其人感化終身不復爲盜其他行事多類此受高年爵卒年八十有一

王彝 由舉人同知解州廉明剛斷百姓呼爲鉄王

王冲 字文會爲諸生時以祖母病嘗割股授唐縣主簿督馬政政既克舉民亦無所損

張傑 字世英由祥符教諭累陞重慶府通判性質實剛果在祥符善於其職陳天台督學政甚重之在重慶督餉其先督者多緩懦無爲否則以賄敗傑則剛以集事而自守亦嚴故獨全也後致仕家居卒年八十有八

王儒 字文宗瑛之孫體貌豐奇踐仁履義任巴縣教諭誨誘有方科目始盛值誕日伏臘必望鄗再拜曰兒仕爲父母也今栖栖萬里外父母惡在淚下潸然關中大饑人相食乃使弟載脯歸養父母餘以及宗族又移宗族可來者三十人於巴里人有來巴者亦予之資使賈以爲活比去巴關中亦稔族黨無死於餓者後調南陽教授克立師道丁憂歸竟不仕家子翰林院檢討九思被誣誣倖壽州儒賜之書曰古之君子竭忠事主非有所不盡也修身慎行其越人非不多也然往往羅於讒古云引誘莫如自修天地日月幾乎煥然亦求無愧於斯而已又何感焉卒年七十有五

九思 字敬夫儒之子由進士選翰林院庶吉士授檢討九年滿考值劉瑾亂政翰林悉調部屬歷練政務公獨得吏部閣老李西涯蔭子赴試公以衆人遇之仕路爲之一清京師有向爲貴翰林今爲真吏部之名然竟以此得罪會瑾敗西涯諷言官以瑾鄉里勅公降壽州同知既抵任理訟備盜俱有實聲嘗監收

武平衛兌軍糧省耗大半毫民賴以復甦近澗湖夏霖二水幾漫其城公文告沉性雨遂止水落者三尺公以文章厭服海內雖不獲布而施爲亦略見居一年會天變言官鈎瑾餘黨勒致仕公既歸里舍得終養二親處兄弟極其友愛又率鄉人行家禮修澇河石橋施醫藥育後學垂四十餘年絕口不譚功利事天下想聞風采卒年八十有四著漢陵集續集碧山樂府遊春記詩餘中山狼院本鄆縣志王氏族譜等書行世與李夢陽何仲默康德涵邊延實王子衡徐昌穀齊名海內稱爲宏治七子萬歷初詔建功臣坊於陝西都會公與焉弟九叙字禹夫儒中子自鄉舉後未嘗赴會試隱居自樂以此終身焉九峯自有傳

九峯 字壽夫儒少子由進士授御史巡視居庸開險阻簡行伍利器物時練習衛官怠惰侵漁者必懲主

將貪儒者必斥按順天貴戚豪強無敢撓旌廉去貪畿內大治其年秋魏幸居庸諸處率同列諫止前後

三十疏不允出爲金華知府明禁令正風俗清獄訟裁冗費四年民大服關路尙書章公 名懋成化丙戌會

元益文選 清介素著卒而家貧幼孤九峯爲請疏月給米二石所著有白關集

張紹芳 字孝先潛心實學且善詩歌人謂有王太史風事父母以孝聞家居四十年片紙不入公門由

舉人初仕襄陵高平教諭正身率士不受束修遷沁水知縣介然自守請託不行調五臺築城禦寇修學

育才百姓有張青天之謠比倅順天名譽益著嘗攝府庫庫吏進羨餘三百金叱去次日申呈上司其行

事類如此後以疾告歸囊橐蕭然

王語 字仲倫甘貧苦學尤善教誨一時名士多出其門有爲他人弟子而不循規矩者亦必而斥之其人

退即改行膺歲薦不仕

魏奉琦 字錦江以明經授隴西訓導隴西士多任俠奉琦裁以禮遂彬彬有鄆魯風遷睢州學正署州

篆發兩豪吏奸賈之法州境肅然稱神君後補王傅慨然曰使我碌碌爲富貴何王之門不可曳長裾然

吾終不三寸翰從鄆陽枚乘後爲麗詞諧語以博王一日歡遂解綬歸里詩文自娛終其身焉

韓期維 字光宋由進士除知河南新鄭縣扶蠶蠶好聽訟以明斷聞吏白庫盈羨若干金期維秋毫不

入己其介凜如也所著有剛錄集五册晴窗綴語二册三益館臺二册于麟絕句解二册藏家

張宏襟 字象南端謹純懿篤於孝友文學尤其所長由進士除知山東萊蕪縣累陞至山西參議提督

學政兼按察僉事時癸酉一榜舉領案三十一人衆服識拔之精逆闖入關強公以僞職抵死不受賊亦

不加害也躬逢 大清定鼎後優游太平二十餘年乃卒

國朝

程明順 字傑吾少學書未成順治二年自陝西石撫軍拔入標下効力六年從孟制府渡河授晉大捷黃撫軍疏薦奉 旨除授撫標都司僉事兼署左營遊擊事十一年馬撫軍委勦大犯興安鎮之夏郝等賊因署總兵事實授遊擊未幾遷參將再遷浙閩督標副將以入海島勦賊功轉河南都督僉事未及赴任卒

王郝 字子仙自幼敏慧過人由進士授山東文登縣令文登山東巨邑多緝紳喜訟公至因俗爲治優禮衣冠平息爭鬪俸未滿以治行最行取戶部主事歷禮部郎中職滿外轉廣東按察司僉事提督學政獎拔孤寒釐正文體士氣爲之一振其坊士錄出海內稱大觀焉時兩臺交章薦以葬父歸卒於家

魏惟紫 字青臣以選拔令河南偃師縣時祖母王年已八旬失明本生父母與嗣父母具慶惟紫悉迎養官署每自擇果脯之美甘手奉祖母而於父母則虔事如一晨昏定省雖公事繁迫得暇即坐祖母側捧其手摩撫數四娛悅其心後以罪謫歸里遂絕意仕進專以承歡祖母爲事前後凡五經大喪所營棺槨衣衾及墳墓誌銘無不堪爲鄉邦矜式至於兄惟野弟惟尙則皆厚爲置產而其事兄也則尤不異事父一味之甘不共不食晚年以兄新葬清明拜掃慟悼不勝遂得疾延十年而卒爲人偉風儀善談論工書法好學能文邑之大制作多借爲重官雖不顯而品重一時歿之日二曲李徵君題其旌曰孝友先生

焦桐 字蔡音由進士除知浙江昌化縣昌化訟者必納白金三錢名曰壓狀蓋假周禮入鈞金東矢之意以剝民財也桐至即并一切陋規革之其禁賭甚嚴密然但設法使之知恥而好賭者自息性質直不務赫赫之名遷知秦興縣其治如任昌化時秦興公堂所用架筆及籤筒等物舊以白金爲之每月一易皆里民輪造者其革之自桐始卒後鄉人稱其兩爲縣令家中不增一間屋一畝田可以徵廉矣信哉

王心敬 字爾緝學者稱豐川先生少孤母李氏守孀節鞠育之一言一動必勸以古聖賢成法故先生自幼遵奉母命年未冠即斷游觀博奕之好奮然以古人爲程年甫二十五並謝諸生舉業負笈從二曲李徵君中孚講正心誠意之學幾十年仍閉戶探討事親教子不輕一步出門年四十後名聞海內一時黔閩吳楚撫軍咸卑禮厚幣聘主講席先生凡晤對卿大夫必期以致君澤民行義達道遇問學之士必期以成己成物隱居求志絕不隨世依阿所著書有易說十卷江漢書院講義十卷正編二十八卷續編二十三卷外編六卷荒政攷二卷尙書質疑二十四卷詩經說三十卷禮記纂二十四卷春秋原經四十四卷又續集五十卷詩草十二卷關學編文獻攬要洗冤錄南行述家禮甯儉編各若干卷曲暢旁通皆本孔孟宗傳爲會歸不蹈後儒門戶偏倚之見至其待人則切切以萬物一體爲懷仁慈公平初無間於親疎遠邇其存心奉身則淡泊兢業蓋自幼至老如一日也康熙雍正間兩次特徵俱以胸塞耳聾實疾固

辭卒年八十有五乾隆甲子陝西巡撫陳公安謀題請准入鄉賢祠長子功季子勛各有傳

功字建侯性好學凡豐川集中與門人論辨者皆其手錄有侍側紀聞數卷雍正己酉以選拔試用知縣初試湖南安福僅五閱月請假告歸百姓攀留愛慕稱楚中前此未有之令再試鄞縣潔己愛民實心辦事令新田著蠶桑成法一書教民樹桑養蠶鄞邑亦爭效之調常甯發奸摘伏人不敢干以私邑中稱爲冰心鐵面不期月息健訟之風刑書院設膏火樂育人才士民有德政歌丁父憂以哀毀成疾遂卒年僅五十二爲人廉介和平歷任四邑家無餘資論者謂克紹庭訓云

勛字茂宏天資穎異自少讀書數行俱下又承其父豐川庭訓學有淵源由拔貢試用知縣初試瀋陽能於其職歷任興安全州潯州府太原府黃州府遷江南安徽副使入都卒於京邸爲人孝友丁外內艱廬墓各三年爲祖父建坊修祠克繼其父豐川顯揚之志事諸昆待諸侄甚篤自登仕籍所在輒有善政去任時士民莫不攀轅流涕而平日遇事有識有膽在興安甫遷全州尙未離任適值邊苗相仇殺其狀甚悍同官皆畏意不敢往勛單騎撫之入密箝中荆棘崎嶇沙霧障天苗民持刃相向勛輕衫纓帽坐小廟中召其渠魁喻以大義彼此帖服羅拜廟前信宿而去至其操守介然有光家學蓋終始如一無愧乃兄云

張正字擇中原籍蒲城人年二十餘以家貧廢學鬻紙簪屋聞二曲李先生倡明正學慕之乃北面受業焉後因與豐川徵君往還移家鄆縣平日雖居肆而手不釋卷爲人端方慎密邑士多愛敬之晚年乃手錄其自得語爲就正錄藏於家子慎儀以鄆籍登賢書途爲鄆人云同時又有魯登闕者字聖居邑處士書師事蓋屋李中孚先生以古之學者自期待好撫琴著琴譜又著初學規要及會心編籥譜引等書藏於家

張呆名不傳嘗從學以家貧未試而廢年近三十始娶妻生一子終身居草屋其婦紡績子彈棉爲生從不與鄉里往還即見亦不輕與之言親知問其故則曰渠輩不欲見我我亦不欲見渠渠言非我所欲聞我言亦非渠輩所欲聞相見何爲多言何爲人因號爲張呆呆聞之笑曰我不呆誰當呆者因以張呆自號年五十後每歲自裏糴過蓋屋詣二曲先生請教先生必留住數日嘗對二曲曰某不知學但覺人生以此心爲根本人將此心如琢玉使之無瑕如拭几使之無垢便是天地間一箇光明人不然縱多才多能亦算不得真人品二曲亟稱之每舉以勵及門嘗題今人古心四字贈之壽八十餘

焦繩武字萬年泰興令桐第三子性孤介年十八爲縣學生抵父任僅四月父卒遺囊蕭然泰興士庶以千金爲贖繩武悉却之恐累其父之廉也乃貸於同鄉商人扶柩而歸此後家計愈艱與諸昆弟晝則

力田夜則讀書孝養祖母怡怡綽綽絕無外營繼而授徒家塾以窮經爲要所著有周易參補春秋翼註藏於家

張宋薪 字橫宗榜名又載以避橫渠先生諱故易之好學攻文勤於著述由舉人選授華州學正培士風重實學不責諸生束修蓋廣文中皎皎者值大計撫軍桂林陳公列入卓異薦云學有淵源卓然師表授項城知縣廉靜慈祥無漸儒吏里誤歸下帷理舊業不入公庭不履市廛尤爲儒林雅望著述甚夥藏於家現有奈園小草行世

賀從 字吾好天資穎悟研窮經籍尤邃於易登賢書連試禮闈不第仍壹志經學平日寡言笑慎步趨不輕取與不妄交接見者皆禮敬之選授狄道學正大學士桂林陳公知其爲純儒從至狄道謁楊椒山祠慨然有講明正學之思每謂諸生曰先賢可學而至其署河州學正語諸生亦以此諸生多遵信焉乾隆壬申卒於官所著有易經管窺詩文稿又有姚海者邑處士自幼嗜書不以貧累志於周易頗知觀玩殫力數十年著易經體傳四卷王通判又撰爲之序

魏樞 字北曜自少篤於實學事親色養備至與從兄弟友愛甚篤居常下帷以諸生入公門爲深恥教鄉里亦以是爲諄諄乾隆中以歲貢任淳化訓導某監生暮夜投金欲退憤於某寒士樞即擲其金面責之

由是諸生無敢干以私者而師道立教化行任六年歸年八十卒

李執中 樞幹魁梧天資純篤自幼從師頗通文義以家貧食糲本省督標下由行伍中式武舉選授武功千總歷遷湖北黃州協中軍都司僉事平日嗜周程張朱講學之書每蒞任逢朔望必率弁兵同集公所宣講 聖諭使之身體力行又捐俸爲兵丁子弟延師課讀以有勇知方爲訓於營伍大有振興故歷任之所兵民和輯

賈自公 字應台幼失恃祖母王氏撫之嘗至村塾竊聽書聲塾師范顯基見而異之即令來學夜讀書苦無繼晷資每侍祖母床側暗中溫故有疑字以香火照之弱冠爲縣學生事祖母至孝祖母病在堂值地震不能起祖母遺之出自公泣下俄屋傾半間祖母幸無恙家人急扶去未幾屋之半間未傾者亦傾人以爲孝感所致後登鄉賢書教授鄉里從遊賴以成名者甚衆潼關道楊某慕其文行聘之再三自公以桑梓爲重不就知者稱之

閻登雲 字雨田嘉慶壬戌進士歷任江蘇金匱吳江等縣廉靜慈祥訟清刑簡所至有政聲稱青天焉其最著者如吳江地瀕黃河歲有水患動費十餘萬金公日夜焦灼思一勞永逸之計遂由數百里外收運馬板草數百萬夾堤兩岸用土壘築隄年水復發堤遂無恙永除水患中丞某札飭所屬悉照法辦理

民到于今稱之

閻震軍 侍衛羅閣之子登雲從姪也軀幹偉大成豐八年武舉以漢南鐵樓川把總擢署河右營都司
擒匪猖狂從督師駐軍黃霸驛賊肆擾率勇三十人逐之賊潰追兩日夜至山又河灣伏賊出圍之血戰
十餘合被重傷賊勸以降罵不絕口賊支解而死督師深惋惜焉從弟震澤武生豪俠有胆略同治壬戌
回變奉 旨各集鄉團邑侯諭令震澤督其事隣村難民皆來依賊突至不及備震澤與其二子合力擊
賊殺傷無數卒以衆寡不敵被鎗而死二子殉焉衆譁潰堡城遂陷其妻在席聞賊至投井而死家人俱
被戕賊壯其人以大旂豎震澤門叱衆賊無得毀室事聞學憲扁其門曰一門正氣

張鏡堂 字蓉生成豐庚申進士爲人沉靜詳審好學不倦不以世故嬰其心有暇輒讀書手不釋卷以
進士即用四川知縣比赴任時賊已猖獗公日夜焦思籌禦敵守城之具憂勞成疾回籍遂卒人皆惜之
鑑堂 字海若鏡堂之弟也成豐戊辰進士河南即用知縣署汜水值水溢爲災辦賑有方民免流離頌聲
四起調署羅山隨補滑縣任滿又署西華固始等縣卒於汴梁省公愛民如子視錢如仇非其義一介不
取好賢禮士堂課之文親爲之修飾潤色決獄如神於無情之訟多寬之不問以故賢者訟其德不肖者
服其化所歷地方頌聲迭作去任之日民扶老攜幼涕泣流連卒之日家無餘資可以徵其廉矣

陳樹楠 字筱園同治辛未進士湖北即用知縣歷署蒲圻通城當陽遠安等縣知縣特授武昌府咸甯
縣知縣歷署數邑政平刑簡吏畏其威民懷其惠在咸甯創修書院捐俸倡湊膏火由是士類爭相磨礪
文風丕振建社倉修西河橋養濟院百廢俱興政聲流聞兩臺交章以卓異薦前後三任咸甯士民于西
河橋立陳公去思碑

魏鼎晉 字銘三同治庚午舉人文行兼優縣主聘主明道書院講席學規嚴整及門多純謹士初署同
州教授訓導與某寒士有隙欲借公革某廩以洩忿持詳文請用印公擲文於地責以大義訓導謀遂寢
其公直類如此署漢中府教授士子悅服解組時贈以德媿正學扁額凡邑中修城垣社倉書院諸義舉
皆異常出力處鄉黨間好爲人排難解紛公在時數十年同里無構訟者至今人皆稱之

以上諸君子雖學問有淺深事業有隱晦要皆不可以一行概者昔夫子與子貢論士曰行己有
恥使於四方不辱君命即次之以宗族稱孝鄉黨稱弟故於列傳後即繼之以孝友傳

孝友

宋

甄婆兒 母劉與同里人董知政忿爭知政擊殺劉氏婆兒始十歲避仇徙居後稍長念母爲知政所殺

方寒食具酒殺詣母墳痛哭歸袖斧往見知政知政方與小兒戲婆兒出其後以斧斫其腦殺之有司上其事太宗嘉其能復母仇特貸焉

明

閻性 廩生幼聰敏事孀母承顏順志甚得歡心母病飲膳湯藥必先嘗而後進衣不解帶者累日及棄養哀毀異常時鳩鵲並巢庭前人謂孝感所致當道以綵幣旌之

王應臻 家甚貧買布爲生以事二親夜常數起問安歲大荒倍力求給一日養不繼潛鬻髮造其隣易粟食親已與妻食糟糠里人感服稍賙之得濟於厄母亡事繼母亦篤又有拾金還主事督學旌其門且給粟優獎之

張被 父紹芳早卒母王氏在堂被問安視膳未嘗一日離膝下與兄析產拈鬮被得大宅竟讓於兄里中無賴子橫逆相加直受不報自少至老足跡不至公門懼辱親也

騫高第 字雲齋邑庠生性至孝友慷慨好義崇正十三年大饑傾粟賑濟全活者甚衆學憲汪公旌其門曰宏仁高士

國朝

王永圖 字伯固邑庠生性純謹雖盛暑不去衣冠接人無少長咸敬之居家孝友年七旬每念及二親輒流涕待弟姪篤愛時人推爲先輩典型

王永清 字印武太學生以孝友稱修髯偉幹崇氣節遇人急難輒纓冠救之事過率不樂人知所交皆一時賢豪當事者知其賢徵辟不就惟屬詠以自適焉

王先身 邑庠生少好學持躬狷介順治二年賀賊陷城奉母閻氏避賊賊至挺身護母與其母俱斃於賊學使鄒令俱以扁旌其門

王應 邑庠生漢陂王太史九思之裔孀母張氏持齋好施嚮家貧供母隨母所施靡有不應愉色婉容務以悅親流賊入城應被擄及歸家母已被殺一哭而絕隣人救之經夕乃甦泣血三年時謂之真孝子

陳調陽 邑庠生性至孝父樓居會樓焚調陽突入火負父出父子肢體一無所傷人以爲神助父卒調陽僅弱冠兄調元早逝遺孤輔聖甫八歲弟調中甫四歲事孀母魏氏先意承志知母素憐孤孫幼子一切家產盡以美者與之又爲之延師取友日夜勸課皆底成立督學使者屢擢其優行

陳輔聖 大學生少孤依孀母形影不離比長制行純篤與物無忤時人方之陳仲弓母病衣不解帶藥必親嘗母一日不食己即一日不食母卒哀毀成疾未踰年卒

魏維野 字濟川邑庠生修幹美鬚和平淵雅事親色養備至待兩弟甚友愛一飯必共片時不偕如失
左右手督學楊公旌其門曰殺身成仁

劉龍州 繼母張氏性嚴急龍州日侍左右略無忤色父卒後事之二十餘年不少衰以明經授教職舉
鄉飲正賓

王忻 徽士心敬父也順治初邑遭寇變賊繫忻母拷索銀幣忻挺身護母賊揮刃中其肩幾殞賊平家業
蕩盡忻力田服買奉母承歡伯兄儲蓄貧忻分已產贖之仲兄怒妻亡遣二子鞠之如己子焉孝友之稱
人無間言乾隆二年奉 旨建坊祀忠孝祠

張玘 父彥俊病啞醫不能治玘日夜涕泣忽有一道人曰我能治汝父病須人肉爲引奈何玘即持刀割
左股肉一塊和藥父病遂愈

王賢 家貧爲人傭供親衣食未嘗少缺或於親舊家遇有菓肉必懷以遺親親未食不敢先嘗及親卒典
身以葬

王邗 邑庠生父病累藥弗愈邗日夜禱神祈藥一日視父囊白即嘗之對兄弟泣曰父病可憂也越數日
其父果亡

劉零昭 自幼即知承順親志恭讓其兄值歲大荒父歿無以爲斂請於兄欲典身辦喪具親族憐而助
之乃克襄事隆冬與兄御車渡豐水零昭勸兄坐車上已獨敲冰入水御車而過脛骨爲冰所傷血流至
足兄子思聰成童勸兄令從師讀書思聰遂入庠而已子漸長其兄亦欲令之讀書零昭謂二子皆讀誰
躬耕乎竟使己子終身任農事鄉里謂其不學而孝友殆出於至性云

屈乃伸 邑庠生九歲就傅年十三念父營生計於外身受嚴寒即欲棄書改業以代父勞父不許始厲
志讀書母閻氏失明十七年承歡孝事始終不渝與弟式好無尤年五十得沉痾不肯聞於父惟戒子弟
聚百順以承父歡並詳及其父他日附身附棺之事遂逝邑人公舉孝友王令懷堂爲之建坊題曰孝友
坊

閻泰臨 邑庠生弱冠即以孝名父病篤嘗盡心憂每夜禱於天願以身代及歿哀毀骨立廬墓三年事
繼母袁氏與親母無異袁氏目已盲泰臨百方調理禱於神者三月一日兩目復明長兄干城有腿疾痛
不欲生泰臨跪乞進食奉湯藥遂愈待諸弟友愛終身又推恩本族濟其困窮康熙六十年歲饑捐糧二
百石族人賴以存活者頗多

孝友固無不義之行而義行不必以孝友著也一時之慷慨一事之合宜一身一家之庸德可風

一邑者皆可錄也不分士民

義行

明

侯峪 景泰時出麥豆三百石賑荒有司以聞賜勅書獎勵勞以羊酒旌之曰義民

魏綱 家貧孤介不妄取大戶王元飲綱肆中遣官銀二十兩次日不知所亡幾欲自縊綱聞之即出原金

與之封志如故一時傳其高韻邑人有事城隍廟四方捐貲約千金餘出入其手功成無以私疑之者

王振世 字安卿邑庠生萬曆乙巳歲大饑與兄生員輔世輸粟百石濟飢民振世沉靜端凝遇有橫逆不與之較所著有浪吟草五陵秋古豐八景圖詩

魯潮江 性好施萬曆甲寅歲大饑潮江親詣撫臺請輸已糧賑荒撫臺諭之曰輸三百石乎江少之又

詢曰五百石乎江又少之竟自輸一千石撫臺喜扁其門曰惠濟羣生又有王惟祐劉堰趙守文張惟炳

王藩張篤皆慷慨好義捐貲賑濟於凡修橋建堡皆不惜己貲以爲衆倡是皆可以風世厲俗也

吳大猷 邑庠生明末流寇蜂起率鄉勇拒賊力戰村破被殺時有劉學鑑率鄉兵救援與大猷同死全調鼎邑庠生闖賊西來領鄉兵堵截格鬪而死張奇英邑庠生拒賊見殺王福邑庠生拒賊見殺王良志

手刃其驍勇者十餘人賊不得入村因刀柄折爲賊所殺劉惲賊至力戰殺賊十餘人救父出復入援村人被賊射死斬之輸邑庠生爲人敦厚重義輕財遇奇荒活人甚衆後因流寇猖獗辱及其身罵詈不絕自縊死

國朝

孫振 字公起邑庠生修髯偉貌疑重寡言聞逆僭號向北流涕自是隱遁不出平生沉酣五經尤好春秋三傳教授生徒務令存理遏欲署邑篆駱公扁其門曰高風絕世同時又有賈應隆字棟伯邑庠生文行兼優將膺歲薦值逆闖之變足跡不入城市居家教授無心進取駱公扁其門曰節義流芳

王圻 邑庠生賀賊陷城圻不少屈以罵賊殺身

張筮 字漢卜邑庠生里人張闖知無辜陷法筮出銀力爲辨冤其人得以不死兄奠故遺子學渠效渠俱幼筮代理其家多方教訓皆底成立順治二年賀賊陷城周令之輔被賊刺傷奸人欲害之筮率族人百餘左右保護至今稱爲義舉

王永嘉 性樂施閱黨有婚喪患難無不調給稱情又嘗焚積券置義塚又有諸生劉必壽歲貢劉昶順治丁酉歲饑里人不能自存必壽借昶捐己貲賑濟不足又出券轉貸隣邑大家得銀粟計口分給里人得

以全活李發榮重義輕財值歲饑出金粟賑濟全活甚衆

關志仁 性尚義年十四途中拾一銀封即書其事揭於門招人認取數日無認取者乃施原銀於城隍廟繼而收養族姪都爲之娶妻始令外居及其歿也復出棺材衣衾殯葬焉又出銀三十兩爲族弟天相娶妻又常給衣食其厚待族人概如此鄉人王某與其身於大姓威逼贖身王某不堪其苦欲投澧水死志仁聞而憐之代出價贖歸跡其素行名曰志仁殆無愧云

附名宦祠 其事跡俱見政績錄

漢

何武 字君公蜀郡郫縣人

唐

裴子餘 絳州稷山人 盧奕 黃門監盧懷慎少子

宋

陳希亮 字公弼眉州青神人 程顥 字伯純河南人 張伋 李宗 大梁人

金

劉君 失其名彭城人

元

察的兒

明

許訴 開封人 徐純 字德善澧州人 張億 程鵬 解州人 康天爵 字汝

修 楊祐 內江人 馬呈圖 字道甫蜀內江人 劉璞 字柘山莒州人 張宗

孟 字泗源山西定襄人 吳憲 安邱舉人年甫二十餘以師道自居爲諸生改正文字各因其長

成就之又教授尚書由是多以尚書舉者 補傳 周億 孝義人事蹟見前

鄉賢祠 其行實俱見者舊傳

唐

殷開山 名曠以字行

宋

楊礪 字汝礪

鄉賢祠 上志

元 賀仁傑 字寬甫

明

張賢 字思齊 王冲 字文會 王九思 字敬夫

國朝

魏惟紫 字青臣 王心敬 字爾耕

節烈祠 其事備載邑志今但錄其氏其未入祠者姑從缺

元

楊氏 閻楨妻

明

王氏 朱威妻 李氏 高徽妻

國朝

王氏 生員陳調元妻 李氏 王忻妻 戴氏 邑民王收妻 戴氏 邑民王模妻

王氏 邑民劉創業妻 高氏 邑民牛義心妻 張氏 邑民李哲妻 楊氏 曹倫妻

陳氏 邑民張岸妻 譚氏 孫詔妻 劉氏 邑民壽炯斗妻 張氏 生員魏藥妻

王氏 杜宗韓妻 姬氏 邑民溫歲妻 王氏 魏聲一妻 王氏 陳我愈妻

楊氏 袁福妻 傅氏 生員陳夏聲妻 劉氏 張篋妻 楊氏 郭綉妻 蕭氏

司琮妻 張氏 李培英妻 劉氏 任道遠妻 袁氏 陳爾道妻 魏氏 陳湯妻

童氏 張惟彥妻 傅氏 趙孟實妻 侯氏 馬寵妻 陳氏 張權妻 閻氏 陳

錄妻 王氏 生員陳子典妻 仝氏 儒童任昌宗妻 康氏 霍鳴度妻 山氏

王作仁妻 譚氏 劉方深妻 劉氏 生員程釋妻 單氏 生員王景著妻 姚氏

韓養基妻 程氏 監生李翰臣妻 嚴氏 仝養氣妻 徐氏 劉唐妻 沈氏 王

國俊妻 童氏 舉人李振年妻 王氏 張守妻 楊氏 李朋妻 程氏 王民諒

妻 齋氏 閻齊妻 張氏 劉學妻 康氏 儒童史廷祥妻 弋氏 趙士貞妻

張氏 孫永烈妻 白氏 段普妻 朱氏 楊芳妻 郭氏 王文才妻 張氏 王京妻

賈氏 生員劉古文妻 郭氏 李學聖妻 范氏 焦文會妻 童氏 韓文煥妻

張氏 焦元沛妻 劉氏 屈含瑛妻 王氏 劉禮昭妻 賈氏 傅懷璧妻 劉

氏 屠信妻 高氏 張國祥妻 李氏 姚德顯妻 施氏 賀三仁妻

人類

鄂民灰渠頭舊為回民所居之地龐家村亦有回民自回匪倡亂多年用兵草薶而禽獮之至今回民絕跡於鄂漢人之外無他族種

戶口

乾嘉以來戶口蕃滋查邑志所載軍民一萬八千三百七十一戶男女大小共一十一萬二千一百四十三口自回匪髮捻倡亂以後戶口寥落所存遺民不過三之一近來 朝廷休養生息略近原額今查刑科冊籍所載戶共一萬六千二百七十口共九萬九千五百一十

氏族 息深者遠自疊積厚者流自光積善餘慶古今通義故凡累葉通顯者必其先世嘗有陰德而世濟其美者也世有為善欲求速報不得遂輟者觀此可以鑒矣

王氏 其受氏之由支派甚衆有十二望未知其的係何支其先河南太康人來仕京兆遂家

高陵卒葬其縣東南鳳正原上今有墓十二人稱大使家墳有繼容繼先繼祖者

元末兵起繼容繼先東行出關繼祖二子克誠克信挈家西走避居鄂縣終南山

中明興徙居城內北街道東遂為鄂縣王氏四世瑛 由貢生授大雷令又補長清令 五

世鉉 有隱德見邑志 六世儒 舉人祥符教諭 七世九思 進士翰林院檢討吏部文選司郎中崇

祀鄉賢 九叙 舉人九峰 由進士授御史 十二世心敬 理學名儒崇祀鄉賢 十三世功 拔

貢歷試安福鄞縣新田知縣調補常甯知縣 勅 拔貢歷試灌陽興安遷全州陞授潯州府太原府黃州府

安徽副使道 十四世師和 拔貢生 十七世夢弼 陣城屯政司 夢燕 舉人 二十世昀 奉

祀生 菑 奉祀生

景氏 楚公族之後漢武徙豪傑於關中今陝西多此姓 其先富平人祖文顯 順治時自富平遷

鄂世居縣南街 三世光福 太學生妻王氏勅旌節孝 五世元常 舉人 元春 歲貢 六世和恩

貢生捐貲賑濟 七世士純 廩生 士端 增生以軍功保薦知縣著有大學晰義防城稿藏於家 士

超 附生 士煒 廩貢 士俊 候銓州右堂 八世哲 優附生鄉飲介賓

張氏 黃帝之後黃帝第五子青陽生揮為弓正觀弧星始制弓矢賜姓張氏 其先世無可考始祖

子倉 前明秦愍王府正四品職原籍浙江温州府瑞安縣洪武間隨駕入陝居省城後遷鄆 子倉以後無譜牒可考至國度之孫士臺勤謹治家樂善好施尊師敬教其家始大孫鏡堂 咸豐庚申進士即用四川知縣 鑑堂 進士即用河南知縣 兆龍 舉人候銓知縣

崔氏 齊太公之後太公生丁公伋伋生叔乙讓國居崔因氏焉 始祖瑛 自邑牛東村遷居縣城進士工部都水司主事改戶部雲南司主事陞本部山東司員外郎自瑛以後無譜牒可考啓積之子宏宏之子應蘭應蘭之子玉徵 進士官至內閣中書 玉儀 候銓通判

崔氏 其遷鄆之初無可考世居邑東崔家灣 始祖登岱 邑庠生其家始大 五世世英 邑庠生鄉飲介資樸誠純謹教誨有方閣里贈匾額曰絳帳風清 六世生梧 生權 布政司經歷博覽羣籍性耽吟咏著有紫閣山人未是草 七世志道 同治壬戌進士翰林院編修歷充功臣館 國史館纂修實錄館總校 日講起居注官廣西鄉試正考官 京察一等 特授四川雅州府知府卓異一次歷署甯遠嘉定府知府

趙氏 造父之後造父事穆王以功封趙子孫因以為氏 原籍鳳陽府始祖永昌 以侍衛秦府任左護衛將軍遂家於鄆之定周村 四世魏妻王氏 勅旌節孝建坊入祠 六世準 綸 雍正間歲

大饑出粟散賑鄉人贈扁額曰恤及鄰鄰 九世樹梓 增生事繼母魏至孝鄉里稱之 十一世元震 業農舉人趙繼聲之父 賈氏 唐叔虞少子公明封於賈故子孫因以為氏又云本自周賈伯之後 其遷鄆之由無可考明末始祖應魁 為司吏崇正七年歲大饑出粟賑濟開操公贈匾額曰義高賑饑 應隆 明廩生文行兼優隱居樂善 國朝邑令駱公奉 旨旌表高士扁其門曰節義流芳 六世積中 歲貢生候銓訓導 交泰 舉人 待價 拔貢任州判 待詔 拔貢官教授 七世靈 附貢生候銓花翎鹽提舉 聯榜 拔貢錫智 舉人 八族漢教習原任邠州學正 含章 舉人 岐山教諭 聯芳 舉人大挑一等原任山西霍州直隸州知州加道銜升用府 八世其順 歲貢生候銓訓導即舉人賈鳴鳳之父 奎 歲貢歷署澄城洛川華州訓導 嘉 慶貢任南鄭縣訓導 敬修 拔貢 鑫 副貢任四川江安知縣

陳氏 虞閩父之子封於陳其後遂為陳氏其遷鄆之時無可考世居縣北街始祖思孝 明隆慶舉人四川太平知縣 一世治體 孝選知縣 二世調元 生員妻王氏 勅旌節孝奉 旨建坊 四世輔聖 以例貢補江西安義縣知縣 璣 進士即用江西安義縣知縣行取中書 六世洪 清

水縣訓導 十一世樹楷 增生髮回之亂辦城防車馬等局蒙縣主保舉候銓訓導 樹楠 進士湖北

即用知縣 十一世遇順 附貢生 遇道 附生

陳氏其遷鄂之時無可考世居宋村始祖蘭 二世琨 鄉飲正賓 四世守基 鄉飲介

賓 六世以謙 議叙六品 七世煥珽 舉人 煥珪 舉人

王氏 其遷鄂之時無可考稽世居縣北街其先譜牒無傳 主一 邑庠生學問淹通勤於訓誨其家始

大二世恪 邑庠生鄉飲介賓 三世文衡 邑庠生 四世偉 業農舉人甯津知縣王恆晉之父 五

世恆震 廩貢生甯津知縣王恆晉之兄

宗教

自我孔子以生民未有之聖祖述堯舜憲章文武後世儒者皆尊師焉所謂天生孔子萬世如長夜也佛教起於天竺東漢時始入中國回教始於天方西北諸夷多從之其族類漸移於中土天主教之昉於猶太復元教之起於日爾曼近來各以其教鳴於口土紛紛矛盾不可究詰今釋道已微不過博取佈施與人唱歌祈禱而已自回匪滋事灰渠頭一帶清真寺盡爲邱墟今已滅迹掃塵無所謂回教者天主教則自咸豐中天津議和法教士駐高陵神甫來鄂傳教而從者尙屬

寥寥自回匪猖獗不殺從教之人由是從者日衆據今日而論天主教人共有六百名口救世教則自近來始賃屋一所以爲演說之區今信從者現有五十名

實業

昔大禹曰德惟善政政在養民而養民之要則曰水火金木土穀惟修而已正德利用厚生惟和而已鄂邑去各埠稍遠亦無工藝之廠故經營工商之業者實屬寥寥然士好讀書農勤稼穡此其可尙也

據今日而論其讀書能文通聖賢立教之旨明中外締交之形者不過千之一讀書識字而通文義者百之一略讀書識字而記姓名者十之二三

鄂邑之民皆以稼穡爲資生之本故凡爲士爲工爲商之家未有不爲農者非若西國之專攻一業以資生也

其作什器以利用者不過五十之一

懋遷有無以阜通財賄者不過五十之一

鄂縣鄉土志下

地理

本境在省治西南五十里外縱一百二十里橫四十里東與長安縣毗連以灃水為界北與咸陽縣毗連以渭水為界西北與興平縣毗連以澇水為界西與盩厔縣毗連以灰渠為界南與寧陝廳毗連以秦嶺為界

城高二丈五尺東西一百九十三步南北五百四十步周二千二百三十四步面積一萬零四百二十二方步陞深一丈五尺城門東曰宜春南曰保康西曰通濟北曰望威四門俱有二層樓四楹高三丈餘四隅亦有敵樓各二楹高二丈七尺城中心建文昌閣臺基四面各闊六丈高二丈五尺其上有樓高四丈五尺上下共計高七丈

縣署在東城門內南向臨街大門四楹門內東為寅賓館北為土地祠又北儀門四楹內有戒石坊坊北正堂六楹東西為庫房正堂東轉北為廡正堂前東為吏

戶禮倉等房西爲兵刑工等房其南爲獄正堂北爲思補堂又北爲知縣內宅其儀門外東偏爲民班捕班儀門內東偏爲快班二班各廳

城守營在縣署東卽舊主簿宅後改爲明道先生祠旁有明道先生手植雙槐今尙存今爲城守營署

典史廳在縣署正堂西南

東學在典史廳西其西爲明倫堂又西爲西學

明倫堂在文廟北門房二楹正堂六楹內爲崇聖祠樓上爲尊經閣

文廟在東街正中其制南向臨街牌坊四楹高二丈以內有二門東曰賢關西曰聖域兩旁門東曰禮門西曰義路又內爲樞星門又內爲戟門六楹東爲名宦祠西爲鄉賢祠各四楹戟門內爲東西兩廡各八楹兩廡北上爲大成殿四面皆重

簷

張公宗孟祠在文廟西今設警察局於其內

公館在東街北向今改爲里民局

養濟院在東門內南順城巷東向

城隍廟在北街西向內南向廊廡道院殿宇共八十餘楹

火神廟在北街東向房間共二十餘楹

賢母祠祀王心敬之母在北街東向

高等小學堂在西街南向卽明道書院所改作者臨街大門房二楹內東西兩廡房各三楹爲門役住宿之所北爲二門兩楹東西號舍各六楹又北爲卷棚講堂各六楹內東西號舍各四楹北上爲吟風弄月樓祀至聖先師孔子及明道程先生

神主其下爲管理員校長住宿處講堂後轉東爲東齋號舍東西二排共十八楹其北東西號舍各四楹北上爲春風堂四楹爲正副教員住宿之處東爲體操場節義祠在高等小學堂西偏卽節烈祠

關帝廟在節義祠西房間共三十餘楹

二廊廟在南街東向房間共十六楹

永裕倉在縣署後房間共三十餘楹社會每操各一處

全境分四鄉共區為十三操大小不等

東鄉凡村堡一百有一內鎮二關外堡七有玉皇樓關帝廟后稷廟三官廟先農壇籍田四畝九分距城二里曰小豐村東西二堡偏北曰青楊寨有太白廟五里曰兆豐橋堡 五堡有文王廟文昌祠元武寺 偏北曰郭家寨青楊務 三堡有太白廟 元柳樹堡周店石佛寺堡 東西二堡 坡頭堡十里曰周貴坊 南北二堡 偏南曰黃家寨索村四堡有石佛寺 偏北曰吳家寨午周村 東西二堡 索家寨侯家廟堡 有關帝廟 韓奇寨東西二堡 十五里曰方家寨龐村 南北二堡有唐李靖廟羅漢寺 沙河寨 東西二堡 第五橋堡 五堡有漢霍光廟 偏南曰喬家庄南沙河寨焦陽村 二堡 崔家灣 東西二堡 偏北曰辛家庄谷子磴 三堡 待詔村 南北二堡 趙王鎮 東西二堡 秣師坡南奇寺堡顯樂村文義村二十里曰西留村偏南稻谷庄 南北二堡 付子村黃堆 南北二堡 偏北曰牛東 南北中三堡有 勅建梁少保敏壯公化鳳之塋 花原頭 四堡 豐十舖 東西二堡 西鄭庄 東界長安 董村 一名海子即周靈園故址有文王廟 二十七里曰王渭村偏南曰白楊寨 霽堡 棗林寨 南有莊嚴寺 張良寨禹王廟堡 有夏禹廟前有禹王泉 南城寨三十里曰

秦渡鎮 四堡即豐宮故址有城隍廟至道觀丹陽井鎮北里許有靈臺遺址鎮東北澧水上有小石橋

西北隅有周文王葬枯骨塚俗名孤魂塚 偏南曰宋村 五堡有棲禪寺一名草堂寺即逍遙園乃鳩

摩羅什譯經處 大良村二十五里曰草市村 東接長安境以上各堡分操六東關外曰

兆豐操又東曰花原操又東曰秦渡操偏南曰新陽操太平操偏北曰文義操

南鄉凡村堡九十有五內鎮一南關堡二有關帝廟風雲雷雨山川各壇距城四

里曰穆家庄 北有長春觀 偏東曰呂公寨八里曰羅什寺堡 南北二堡寺內有淨土樹相

傳為羅什足臭土所化 偏西北曰搖子頭 有釣魚臺在澗水中 偏東曰南馬營偏東北曰

陳兵坊 相傳為唐柴紹妻歸別墅散家聚徒衆處 宋家庄麥張寨 有水月菴 下馬營 東西二

堡屯里 東西二堡 雙庄 東西二堡有伍子胥廟 四府里新陽村裴家寨十二里曰辛粟

村 南北二堡有三官廟關帝廟 偏東曰天和村 八堡有圓通寺太白廟 獨庄白虎寺堡 有

白虎寺 安善坊堡 四堡有安善坊 安爾堡沈家營 南北二堡 保峪坊靈山寺堡 有靈山

寺即程明道先生擊佛頂除惑處 余下堡占管營 三堡有太白廟 舊泉坊 南北二堡有青龍寺

淡家寨後寨新寨爐丹村 三堡 鄭村 有清正菴西南即楊狀元墓 姚家河孫姑村草廟

寨十五里曰石井村 舊傳有石井今廢東西二堡有花原寺 偏西曰白雲寺堡 有白雲寺熊家灣栗峪口堡 山坡有明陽寺即漢甘泉宮故址 東澗峪口堡 偏東曰方勝村 四堡有漢曲逆侯陳平墓 站馬堡柿園里 東西二堡 馮官寨阿姑泉堡 有彌陀寺 五庄化羊村 三堡 龐光鎮 三堡有城隍廟 王寨 村西有普明寺 李源寨古家寨焦將村 東西二堡俗傳有焦贊墓西有雲際寺 高呂渠二一府堡 北即重雲寺 杜家庄萬家寨唐旂寨南坡堡葉家寨 大堰口堡官亭營 有長興寺 二十里窩庄下庄上庄 南有大悲寺 偏西北逾澗水曰七姓庄北曰水磨頭龍家寨 以上各堡分操四南關外曰羅什操偏東曰安善操又東曰保峪操又東曰化羊操

西鄉凡村堡四十有一 西關堡二 有二官樓澗水經其西上有太史橋 明嘉靖壬寅王太史九思所建 橋頭有寺 西有西河亭距城二里曰西坡 南北二堡 偏北曰河頭 南北二堡北堡鶴鳴原上有王徵士心敬墓 二里曰陂頭 四堡有周王季陵東嶽廟即秦贊陽宮故址東有漢陂石橋自唐以來名人碑記未可殫述北有九女塚相傳即秦二世孫公主處 偏南曰孫家禮 四堡有王豐川所修二曲書院遺址 五里曰曲抱村 有玉蟾臺 偏北曰亭子頭 有

觀音寺 偏南曰倫公村 四堡 六里曰小寨斑竹園 三堡有竹林寺 八里曰索家庄 三堡 偏南曰石橋寨割爾庄 有集閣 偏北曰晉侯村 南北二堡相傳即秦伯獲晉侯處 元王村 三堡 十里曰丈八寺村 南北二堡有丈八寺胡公廟 偏北曰二旗里灰渠頭 接盤屋界 格家庄十八里曰東八十村雷家寨 以上各堡分操一曰正西操

北鄉凡村堡八十有六 內鎮二 北關堡一 有興國寺北極樓北極宮城西隅有社稷壇東隅有厲壇太公廟距城二里曰韓村 東西二堡 三里曰六老巷 南北二堡有王太史九思王副使九峯之墓 五里曰孝義坊 東西二堡 偏東曰浮雲村婁村 有婁敬菴婁敬菴相傳為漢建信侯修道處 郭村 三堡 偏西曰洪洞菴甯菴堡 東西二堡 留村八里曰小寨 偏東曰羊村 三堡 石村 偏西曰百付村 南北二堡 中原寺堡奇家寨黃付村 有青龍寺 十里曰崔村 三堡 偏東曰李伯村 三堡 偏西曰趙王村 十三里曰陶官寨 偏東曰許官寨野口村牙道里 三堡 槐道村真花磴宜都村 偏西曰禮賢庄 東西二堡 圪塔頭十五里曰均河村 東西二堡 偏東曰真守村 三堡 十王村有勝光寺 王守村趙倫村鑿齒村 有道安寺及晉習鑿齒墓 偏西曰復興寨魯家寨澗店鎮 南北

二堡有城隍廟西臨澇水有石橋西北接興平界一二十里雙槐堡偏東曰小王店大王鎮東
西二堡有城隍廟吳村偏西曰馮村馬營堡姚村南北二堡有禹王廟三過村相傳即夏禹
舊宅乃三過其門而不入處一十一里曰留南村偏東曰程家灣偏西曰渭曲坊三堡
祁村二堡一十三里曰定舟村南北二堡偏東曰付村二堡偏西曰元村四堡二
十六里曰龍臺坊偏東曰北宋村二堡西亂庄東接長安界二十八里曰康王村
五堡三十里曰興仁堡以上各堡分操二北關外曰西北操偏東曰正北操

山

鄠之南境皆山也東接長安西接盩厔皆爲終南山其隨地異名之最著者自西
而東爲次列之

終南山 其脈自盩厔而來東亘長安境 白雲山 在縣南羅什操南境與縣治對其下有白雲觀老
子泉 蓮花山 在縣南保峪操南境曲峪內 牛首山 在縣南化羊操南境其東爲天齊廟下有金峯
寺東爲牛心嶺 化羊山 即化羊峪諸山其最高者曰將軍山 圭峯山 在化羊山東與重雲寺南北
相對其形如圭故名又有小圭峯在草堂寺東 雞頭山 在縣東南太平操南境形似雞頭故名 萬花

山 在縣南太平操南境 紫閣峯黃閣峯 俱在縣東南太平操南境太平峪內其形上竦若樓閣然
故名 子房山 在紫閣峯東相傳爲張良辟穀處其下有寶林寺

水

鄠邑諸水除渭水自西流入本境外餘皆出於縣南終南山而北流者也今撮其
大者列之而川澤陂池附焉

渭水 在縣北三十里自興平縣界流入過西北正北二操北境入咸陽界 澇水 在縣西關外源出縣
南羅什操南境澇峪北流過正西西北二操而入渭 栗水 出縣南羅什操南境栗峪入澇 漢陂水 在
縣西五里其源從丈八寺堡北伏地湧出 呂公河 在縣東關外明萬歷中知縣呂仲信引檀谷水過安
善兆豐二操繞縣東城北折而入澇 扈水 在縣東二十里出終南山扈陽谷中北流過化羊新陽花原
三操入咸陽界 太平河 出縣東太平操南境太平峪北流過新陽文義二操入咸陽界 澧水 在縣
東三十里出長安縣南澧峪西折入境過秦渡鎮城東北流經長安境而入渭 胡公泉 在縣西南丈八
村泉上有胡公廟或曰吳公廟俱無可考澆田千頃其水不竭 白沙泉 在縣西正西操割耳庄沒豬
泉在縣東南二十里孫姑村 阿姑泉 在縣南安善操南境抱峪山下 冷泉 在縣東保峪操雙庄

水注谿者谷也鄆邑南境皆山其中居民鮮少零星不可以村堡計故以谷誌之以見其大略云

澇峪 在縣西南三十里羅什操南境峪口有教場相傳爲唐殷開山練兵處內有大庄坪八里坪七畝坪犁轅坪苦竹溝般家坡楊家庄俱土田肥美之區 栗峪 在縣南二十里羅什操南境山坡有藥王洞峪內有馬連岔車轅坡石牆溝逃軍庄東西夾溝由峪口至黑龍太王嶺約三十里 皂峪 在縣南二十里羅什操南境內有東平溝西平溝山倉殿子房洞兵溝鐵樓溝黃土坡銀洞溝諸地名 直峪 在皂峪西山坡有大悲寺新興寺 抱峪 在皂峪東有寶泉寺 檀峪 在抱峪東有老君菴李靖泉 曲峪 在檀峪東內有石灰洞蒿平潭鷓鴣嶺諸地名 黃柏峪 在曲峪內有土地嶺絕頂有金山寺 烏桑峪 在曲峪內有仙人橋長仙洞 太平峪 在曲峪東其西山即圭峯也峪內有長嘯洞藥王洞寄馬庄諸勝蹟 峪外有唐太平宮即今真武廟 神水峪 在太平峪東內有睡佛洞 高冠峪 在神水峪東內有康士菴峪口有高冠潭飛泉下注謂之瀑布

道路

由縣治東門外東行至省城有二路十里曰周貴坊又十里曰西留村又十里曰

秦渡鎮逾澧水入長安界又由周貴坊分一支十里至西鄭庄又五里至梁家橋逾澧水入長安界由縣治南門外南行十里曰辛栗村又西南行十里曰東澇峪口又十里曰教場又十里曰土嶺又十里曰林兒又十里曰沙嶺子又十里曰龍王廟又十五里曰秦嶺入甯陝界由縣治西門外西行十里曰灰渠頭入盤屋界由縣治北門外西北行十里曰奇家寨又十里曰澇店逾澇水入興平界由縣治北門外東北行十里曰東羊村又十里曰大王鎮又五里曰康王村入咸陽界

物產 鄆邑民俗簡陋耕穡而外別無所長於畜牧種植均未講求新法而工藝尤不能推陳出新非

特物產未臻蕃盛一切製造皆拘守故常雖鄆稱陸海終不免貨棄於地之譏良可慨已

動物則有馬牛驢羊豕犬兔 以上皆常產 虎豹鹿麝狼熊狐貉猿猴 以上皆特產 雞鴨鵝 以上常產 山雞野鴨鶴鷺鸚鵡黃鸝布穀 以上皆特產 釀蜜之蜂吐絲之蠶魚蝦螺鱉鼈蛙 以上皆常產 漢陂之鱖 見蘇東坡漢陂魚詩 澇之飛魚 見山海經狀似鱸可以療痔漏疾甜明一統志作鮓二物特產

論曰園圃陂池鄆杜固有之利今概棄而弗講惟於飼蠶皆視爲應勤之本務是固周室夫耕婦蠶之遺

俗尙有存者班固謂禮鎬之民有先王遺風信然

植物則有麥 大小二種 青稞稻 稔稔二種 菽 俗謂之豆有豌豆小豆黃豆白豆綠豆黑豆數種
梁黍玉黍 俗名包穀 稷薑芋 顏師古曰芋葉似荷而長不圓其根可食有白者亦有紫者一名蹲鴟
紅薯 此種係桂林陳公所遺者 棉麻桑榆柳楊 有黃白青三種 松柏椅桐梓漆 出南山文
楸 以上皆常產 白骨松油柏 特產俱出南山 木竹墨竹斑竹 俱常產 紫竹 特產 胡桃
蘋果石榴海榴杏桃柿李梨 有數種 栗 以上皆常產 銀杏 特產 百合山藥薇蕨 俱
出南山 蓮藕瓜 有數種 竹筍窩笋葱蒜辣 以上皆常產 茭白 特產 烏藥藍 常產俱
大宗 紅花 特產 升麻鬼草 二藥出牛首山鬼草葉如葵赤莖秀如禾服之使人不要 香附白芷
半夏澤瀉薯蕷地黃茱萸蒼朮南星野黨 出南山 紫蘇 出阿姑泉者佳 天麻 以上皆
常產 牡丹芍藥繡毬玉蘭 今玉蟾臺有一大株紫薇海棠黃桂丹桂凌霄辛夷菊蓮梅
有數種 紫荊白荊萱草唐棣 以上皆常產 蘭蕙 二種出南山特產 葛茶
論曰禮鎬之間疆爲土膏五穀美種而外其地最宜樹木蔬果花卉之類南山一帶今已若彼濼濼使有
周官山虞之禁令則材木不可勝用也

礦物則有金銀鑛銅鐵鑛 二鑛在澇峪內樺梨灣 煤礦 在澇峪內石轆溝

論曰東方朔諫除上林苑疏南山出玉石金銀銅鐵異物之類不可勝原鄆屬之鑛當亦不少特民智未
開不諳鑛學只得聽其封閉澇峪煤礦光緒八年紳民集股開採旋以山路不便轉運中止繼經 上憲
委員修理運路奈炭色不佳銷路不暢徒費千金終無成效惜哉

動物製造則有鞣皮辦皮繩碾毛氈織毛帶縲絲灌羊油燭羅底蜂蜜

論曰鄆民手工均未甚良僅有皮工數家而治骨角者猶難其人縲絲又半恃女工所有羊毛牛皮蠶繭
等物多被省商購去製成熟貨轉售於我則利權外溢豈非一大缺點哉

植物製造則有牀榻棹椅木箱木匣竹簾竹籃雨笠以竹爲之輓以樺皮竹篩掃帚火
紙柏油枋塊木耳錠藕粉木炭燒酒黃酒油棉布麻鞋麻繩葛鞋

論曰鄆之植物惟棉花爲一大宗而紡織全恃人工若代以機器則費省價廉布之精細自足以抵制洋
布然而難矣

礦物製造則有鋼南山內有製鋼廠石灰澇峪栗峪化羊峪所出

論曰南山金銀銅鐵各鑛尙未開採所製之鋼實在鄆屬開廠石灰一項本地自然之利亦礦類也故

附志之

商務 鄆地褊小兼非衝要之區外而五鎮內而縣城皆鮮巨商會萃道成間城內街市尙稱繁盛兵

燹之餘市井蕭索至今元氣未復惟秦鎮各商尙有起色每年銷數尙無定額今姑就大概情

形言之

食品薑種者最夥經久不壞 由陸路運至乾鳳甘肅每年約銷四五十萬斤本境約銷
十萬斤芋 有紅白二種紅即紅薯白者俗名芋頭 由陸路運至省城咸陽涇原郿武每年
約銷六百萬斤本境約銷二百萬斤烏藥由陸路運至乾鳳興漢甘肅水運至山
西每年約銷五六十萬斤本境約銷二十萬斤胡桃 出南山發售以斗石計以人力馬
力運至省城咸陽涇原郿武臨渭每年約銷五六萬石本境約銷一二萬石百合
木耳 出南山 由陸路運至省城每年各銷三四千斤本境各銷千餘斤竹筴茭白
由陸路運至省城每年各銷二萬餘斤本境各銷五六千斤藕粉 所製真粉色味俱佳
偽貨甚多 由陸路運至甘肅四川水運至山西河南每年約銷二十萬包每包天平秤
十四兩 本境銷四五千包黃酒 縣內有酒館三四家每製酒一甕用米七斗清爲酒濁爲醅不能

遠行本境每年約銷二三百甕燒酒 本境亦有製者 每年約銷十餘萬斤由鳳翔及
醴泉陸運至鄆每年約銷十餘萬斤鹽由山西潞州水運至河口由河口經渭陸
運至省城以至於鄆每年約銷三十萬斤榆由山西聞喜水運至河口經渭陸運
至鄆每年約銷六萬斤棗由同州府陸運至鄆每年約銷七萬斤水烟由蘭州陸
運至省城由省城運鄆每年約銷四五百斤蜜 出南山者最多 由人力運至省城咸
陽興平等處每年約銷二三百桶本境約銷二三十桶

論曰藕粉爲鄆地製造之極品且係行遠一大宗乃奸商希圖取利撻以雜粉以致貨失其真名譽頓減
亦恨事也

用物繭由陸運至省城每年約銷四五千斤本境銷七八百斤牛羊皮由陸運至
省城每年約銷千餘張本境約銷二三百張羊毛由陸運至省城每年約銷六七
百斤本境約銷二三百斤絲由陸運至省城每年約銷四五百斤本境約銷二百
斤火紙 廠設潯峪內之八里坪七畝坪發賣以捆計 由陸運至省城咸陽醴泉乾鳳郿武等
處每年約銷六七百捆本境約銷一二百捆 每捆五十餘斤八千張 松柏枋塊 廠設潯

塔內俗謂之做廟 由澇水運至咸陽分路陸路運至甘肅水路運至山西每年約銷七八百副本境約銷三四百副石灰 澇峪栗峪化羊峪皆有礬灰色甲於各縣 由陸運至省城盤武咸渭等處每年約銷六七十萬斤本境約銷十萬斤漆 南山漆樹最多土人割取其汁盛以木桶每桶七八十斤不等 由陸運至省城由省城運至乾鳳同朝等處每年約銷七八千桶本境約銷五六百桶 藍所製出邑之東南鄉者佳 由陸運至省城咸陽盤屋乾鳳等處每年約銷八九十萬斤本境約銷十八九萬斤柏泥 水磨頭一帶製 由陸運至省城咸陽等處每年約銷二三十萬塊本境銷二二三萬塊木炭 出南山各峪內 由陸運至省城咸陽涇原等處每年約銷四五百萬斤本境約銷五六十萬斤掃帚 出南山 由陸運至長安咸陽等處每年約銷六七百萬把本境銷一二十萬把雨帽由陸運至咸陽扶風等處每年約銷六七十萬頂本境銷五六萬頂竹篩竹籠由陸路運至省城咸陽等處每年約銷七八萬箇本境約銷一二萬箇麻 本地出產自用約萬斤 由富平鳳翔陸運至鄂每年約銷二十餘萬斤菜油 本地製油者不純用菜子雜以棉子鴛粟子名曰雜油在本境行銷歲約五六萬斤 由渭河北興平醴泉

等處陸路運至鄂每年約銷十餘萬斤洋布洋斜由省城陸運至鄂每年約銷二三千疋草帽由渭南陸運至鄂每年約銷七八萬頂木箱竹箱木匣及小兒玩器以人力運至咸陽涇原等處每年銷數無定大約值錢二三千串

論曰南山材木近已刊伐殆盡做廟者寥寥數家火紙廠為自來火所隔幾乎閉歇咸同之間木坊每年銷三四千副火紙銷三四千捆今之銷數不及其半貿易之衰大都類此

鐵磁鐵貨 如鐵釘鐵鎖之類除自製外 由山西澤州潞安等府水運至河口由河口陸運至鄂每年共銷六七萬斤鑄鐵土由山西河津樊村鎮水運至咸陽由咸陽陸運至鄂每年共銷十餘萬葉鏟刃由省城陸運至鄂每年約銷七八萬張磁器如盆甕碗礮等物俱曰磁器以馱計 用騾馬力由耀州運至鄂每年約銷一千馱石炭由山西水運至咸陽由咸陽陸運至鄂每年約銷四五萬斤鐵鍋由山西運來每年約銷五百口

以上各門凡縣志所不載類由採訪而得其地理與邑志間有異者則由古今形勢之變遷或由邑志攷之未詳今更正之非臆說也

終